

**KANTONALNA
PRIVREDNA
KOMORA TUZLA**

**BROJ 7 i 8/17,
juli/avgust
2017. godine**



KOMORSKI INFORMATOR



**PRIVREDA TK PONOVO NA
ZEPSU**



**SASTANAK MINISTRA
PUŠKARA I PREDSTAVNIKA
KOMORE TUZLA**



**“WORTMANN METAL”:
USPJEŠNA PORODIČNA FIRMA!**



**“PRIMA VIP” PROIZVODI
OSVAJAJU TRŽIŠTE**



Komorski informator

Uvod

Poštovani čitaoci!



U aktuelnom momentu komorskog sistema ne samo u Bosni i Hercegovini nego u cijelom regionu, značajno je primjetiti da raste broj privrednih subjekata koji se odlučuju na uclanjenje u Komoru. Bar kada je riječ o broju firmi članica Kantonalne privredne komore Tuzla, sa zadovoljstvom konstatujemo porast. Mora se priznati i da su poduzete konkretnije i značajnije aktivnosti na terenu, obilaze se firme, razgovara se sa novim, potencijalnim članicama, nudimo se na tržištu, pokušavamo jačati sistem, uvjeruavajući da samo zajedništvom možemo do promjena, do prosperiteta i boljeg sutra. I ima rezultata. Konkretno, već u ovom broju predstavljamo jednu uspješnu firmu, na našu veliku sreću i zadovoljstvo, od skora članicu Komore Tuzla, a već dobro poznatu na prostoru cijele Bosne i Hercegovine. Riječ je o firmi „Wortmann Metal“.

Sa zadovoljstvom također ističemo i nastavak sajamskih aktivnosti. Nekako se u vrijeme godišnjih odmora utihne sa tim aktivnostima ali već od avgusta se ponovo razmišlja gdje bi se moglo i trebalo, gdje ima interesa privrednika, predstaviti naše članice. Reklo bi se da po pravilu ove aktivnosti počinju sa sajmom u Gradačcu. Kako se poklapa priprema ovog izdanja Komorskog informatora i održavanje 44. Međunarodnog sajma poljoprivrede i prehrambene industrije – Sajam šljive u Gradačcu, o ovoj značajnoj sajamskoj manifestaciji i nastupu „Privrede Tk“, pisat ćemo u narednom broju. Tek, nadamo se i nekim priznanjima za naše članice. Raduju pregovori, reklo bi se već i dogovori oko našeg ponovnog nastupa na sajmu Zeps. U Kantonalnoj privrednoj komori Tuzla je upriličen sastanak na kojem su razmatrane mogućnosti povratka „Privrede TK“ na sajam Zeps. Do sastanka je došlo na inicijativu Kasima Selimović vlasnika firme „Piemonte“ Tuzla i MI „Prima VIP“ Orašje i predsjednika Odbora Udruženja za trgovinu, turizam i ugostiteljstvo Kantonalne privredne komore Tuzla. Nedret Kikanović predsjednik Komore je sa saradnicima ugostio Vedada Šestića generalnog direktora Zeničkog privrednog sajma „Zeps“ i reklo bi se, dogovorio naš povratak u Zenicu. Pored toga, do kraja godine nas očekuju i nastupi na sajmovima u Bihacu, Bijeljini, Zaječaru, Banjaluci, Brčkom, treba otići do Osijeka, Novog Sada...

Tek, uz ovo pomenuto i brojne druge informacije koje donosi Komorski informator, izdanje za juli i avgust, topla je preporuka i priča koju donosimo iz Orašja. Bili smo u posjeti firmi MI „Prima VIP“ Orašje koja je u vlasništvu našeg dugogodišnjeg člana i predstavlja još jednu priču o uspješnom poslovanju...

Dino Kalesić
gl. i odg. urednik

Komorski informator

Sadržaj

KANTONALNA PRIVREDNA KOMORA TUZLA

KOMORSKI INFORMATOR
BROJ 7 i 8/17,
juli/avgust
2017. godine

IZDAVAČKI SAVJET:

1. Nedret Kikanović, član
2. Mirsad Kukić, član
3. Bajazit Jašarević, član
4. Suad Selimović, član
5. Nurudin Žunić

REDAKCIJSKI KOLEGIJ:

1. Nedret Kikanović, član
2. Almir Mešić, član
3. Nurudin Žunić, član
4. Suad Selimović, član

IZDAVAČ:

Kantonalna privredna
komora Tuzla

GL. I ODGOVORNI UREDNIK:
Dino Kalesić

**TEHNIČKA PRIPREMA,
REPRO I ŠTAMPA:**
GRIN d.o.o. Gračanica

ZA ŠTAMPARIJU:
Adnan Imerović, direktor

TIRAŽ:
500 primjeraka.

ADRESA:
Trg slobode bb
e-mail: kpktz.ba@bih.net.ba
<http://www.kpktz.ba>

	PRIVREDA TK PONOVO NA ZEPSU	4
	NAJAVA SAJAMSKIH AKTIVNOSTI	5
	MINISTAR OSMAN PUŠKAR ODRŽAO SASTANAK SA PREDSTAVNICIMA KANTONALNE PRIVREDNE KOMORE TUZLA	6
	USVOJENA INFORMACIJA O ENERGETSKOJ DOZVOLI ZA IZGRADNJU TE „BANOVIĆI“	7
	RUDNICI 'KREKA' DUGOVANJA ĆE ISPLATITI NA RATE	7
	POTPISAN PROTOKOL O SARADNJI IZMEĐU VLADE TK I PROJEKTA ILDP-A	8
	PRIJETI NESTANAK STOČNOG FONDA, GAŠENJE GAZDINSTAVA	9
	„WORTMANN METAL“: USPJEŠNA PORODIČNA FIRMA!	10 i 11
	„PRIMA VIP“ PROIZVODI OSVAJAJU TRŽIŠTE	12 i 13
	POKRETANJE AGROPROIZVODNJE I UZGOJA KOZA	17
	„SOLANA“ TUZLA PRVA BH KOMPANIJA SA GC-MARK® OZNAKOM	19
	PIVARA TUZLA U RAD PUSTILA SISTEME ZA CO2 I PAKOVANJE PROIZVODA	20
	USPJEŠNIH 15 GODINA „FININGA“...	22



U susret najvećem bh sajmu...

Privreda TK ponovo na Zepsu

Sastanak u Komori na inicijativu Kasima Selimović vlasnika firme "Piemonte" Tuzla i MI "Prima VIP" Orašje i predsjednika Odbora Udruženja za trgovinu, turizam i ugostiteljstvo Kantonalne privredne komore Tuzla



U Kantonalnoj privrednoj komori Tuzla je upriličen sastanak na kojem su razmatrane mogućnosti povratka "Privrede TK" na sajam Zeps. Do sastanka je došlo na inicijativu Kasima Selimović vlasnika firme "Piemonte" Tuzla i MI "Prima VIP" Orašje i predsjednika Odbora Udruženja za trgovinu, turizam i ugostiteljstvo Kantonalne privredne komore Tuzla. Nedret Kikanović predsjednik Komore je sa saradnicima ugostio Vedada Šestića generalnog direktora Zeničkog privrednog sajma "Zeps". Razgovaralo se o aktuelnom momentu bh privrede, poteškoćama sa kojima se privrednici susreću, ulozi države u otklanjanju tih problema kao i o industrijskim kretanjima na području Tuzlanskog i Zeničko-Dobojskog kantona te Tuzle i Zenice. Neizostavno, tema razgovora je bio i pojačan odliv mladih iz Bosne i Hercegovine u zemlje zapadne Evrope, naponi koje treba poduzeti kako bi mladi ostali u BiH, te nedostatak adekvatnih kadrova što predstavlja problem sa kojim se poslodavci već godinama bore. Direktor Šestić je, izrazivši zadovoljstvo zbog upriličenog sastanka, predstavio sajam Zeps. Govorio je o istorijatu prvu bh sajma, aktivnostima i rezultatima iz prethodnih godina, vlasničkoj strukturi sajma čiji je organizator Poslovni sistem RMK Zenica. "Finansiranje sajmovi u Bosni i Hercegovini je složen problem a s tim u vezi je uvijek aktuelna tema i finansijska konstrukcija sajma Zeps za čije održavanje se ulažu veliki naponi. Nastojima uspostaviti saradnju sa brojnim institucijama pa je s tim uvezi ponuđena platforma za saradnju sa privrednim komorama kako bi se zajednički radilo na jačanju komorskog sistema, ujedno, doprinijelo razvoju zeničkog sajma. Uspostavilo se i niz kontakata sa stranim ambasadama u našoj zemlji s ciljem da se ponovo obezbijedi zemlja koja će imati status zemlje-partnera, što nije bio slučaj u posljednjih nekoliko godina. Nastojimo pratiti sadržaje Sajma učiniti kvalitetnijima i boljima iz godine u godinu", rekao je direktor Šestić. Istakao je dobro pripremljenu platformu za saradnju sa Privrednom komorom USK Bihać, projekat koji u konačnici nije podržalo resorno ministarstvo, ali koji je vlastitim naporima zaživio pa se privrednici Zenice i Bihaća, na bazi uzajamnog ustupanja sajamskog prostora, predstavljaju na dvije veoma značajne sajamske manifestacije u našoj zemlji, Ekobis i Zeps. Želja je, ističe generalni direktor Šestić, istu platformu primijeniti i sa Kantonalnom privrednom komorom Tuzla, naravno, sa svim drugim zainteresovanim komorama i institucijama. Upućen je

danaz poziv Komori Tuzla za nastup na Zepsu: "Bilo bi nam veoma drago da obje strane učine maksimalne napore, predstavite Privredu TK na sajmu Zeps, čime se učini prvi korak da dugoročnoj, nadamo se, obostrano uspješnoj saradnji. Želja je da otvorimo mogućnosti privrednim subjektima za nove kontakte a njihovo zadovoljstvo i uspješan nastup, temelj su njihovog ponovnog i stalnog dolaska u Zenicu koja je sajamski grad, grad dobar domaćin i grad iz kojeg se, oni koji dolaze da otvore nova tržišta, tradicionalno vraćaju zadovoljni", izjavio je Vedad Šestić generalni direktor Zeničkog privrednog sajma "Zeps". Predsjednik Kikanović je prezentovao ovom prilikom bogato iskustvo Komore u organizovanju zajedničkih sajamskih nastupa u posljednjih petnaestak godina. "Mi imamo iskustvo, imamo ljude koji već niz godina organizuju postavke na kojima se predstavljaju privredni subjekti, firme članice Komore. Godišnje smo prisutni na 10 do 12 sajmovi u zemlji i inostranstvu, u skladu sa mogućnostima, i bilježimo zapažene nastupe na sajmovima u Gradačcu, Gračanici, Lukavcu, Bihaću, Zenici, Mostaru, Brčko Distriktu, Banjaluci, Bijeljini, Osijeku, Splitu, Zagrebu, Virovitici, Bjelovaru, Zrenjaninu, Novom Sadu, Zaječaru. Naše firme se vraćaju zadovolje, uspostavljaju saradnju, otvaraju nova tržišta, dogovaraju značajne poslove, nerijetko se vraćaju sa značajnim priznanjima i možemo reći na osnovu svega do sada učinjenog, da su prilično zadovoljni konceptom sajamskom nastupa koji gaji i za njih organizuje Kantonalna privredna komora Tuzla. Komora je spremna biti partner sajma Zeps, ponovo doći i nastupiti u Zenici gdje smo ranijih godina imali zapažene nastupe a gdje nas nije bilo u posljednje 3-4 godine, onako kao bismo mi to željeli i kao žele naše članice" rekao je predsjednik Kikanović. Na kraju, istakao je kako će se učiniti maksimalni naponi da se u najboljem svjetlu predstave, promovišu firme članice Komore, da se na najbolji način prezentuju njihovi proizvodi i aktivnosti i da se i sa ovog sajma svi vrate zadovoljni. Prvi je ovo korak ka povratku Privrede TK na sajam Zeps u Zenici a obje strane su stava da je dobar dio dogovora već postignut i da će se stvoriti platforma za saradnju na obostrano zadovoljstvo i godine koje dolaze.

Pripremio: Dino Kalesić



Najava sajamskih aktivnosti...

Bihać: Sajam "Ekobis 2017" od 14. do 16. septembra



Privredna komora USK organizira 15. Međunarodni ekološki sajam „EKOBIS 2017“ koji će se održati u Bihaću od 14. do 16.09.2017. godine. Više od desetljeća MEĐUNARODNI EKOLOŠKI SAJAM – EKOBIS je najpoznatija i najposjećenija privredna i ekološka manifestacija u široj regiji. Ovaj status EKOBIS održava kreiranjem pozitivnog poslovnog ambijenta, kroz visoke usluge poslovnog umrežavanja izlagača i posjetitelja, ali i organizacijom svih drugih sadržaja i poslovnih događanja prilagođenih potrebama i željama izlagača. U proteklih 14 godina postojanja na sajmu „EKOBIS“ se predstavilo više od 2 700 izlagača iz 18 zemalja, a sajam je posjetilo preko 200 000 posjetitelja. Ovim brojkama svakako treba dodati i preko 500 uspješno realiziranih pratećih sadržaja. Osim toga, sva sajamska događanja prate najznačajnije medijske kuće u regiji. Sve ovo su dobri argumenti da Vas pozovemo da na vrijeme rezervirate Vaš izložbeni prostor, ali i da prijavite aktivnosti vezane za prateće sadržaje (promocije, prezentacije, degustacije, okrugle stolove i ostale sadržaje). Pratite sve aktivnosti vezane za organizaciju sajma na službenoj stranici sajma www.ekobis.info, kao i na stranici Privredne komore USK www.pkusk.com.

Zaječar: 6. sajam "Zdravo-domaće-prirodno" 29. i 30.9.



Privredna komora Srbije- Regionalna privredna komora Zaječarskog i Borskog upravnog okruga i Grad Zaječar Vas, sa velikim zadovoljstvom, pozivaju da prisustvujete 6. MEĐUNARODNOM SAJMU „ZDRAVO-DOMAĆE-PRIRODNO“, 3. SAJMU FINANSIRANJA I 2. SAJMU TURIZMA (pozivno pismo klikom na sliku)...

U periodu od 29. do 30. septembra 2017. godine, u organizaciji Grada Zaječara, uz podršku Privredne komore Srbije - Regionalne privredne komore Zaječarskog i Borskog okruga, biće održani 6. međunarodni sajam „Zdravo domaće prirodno“, 3. sajam finansiranja i 2. sajam turizma. Sajam će se održati, kao i prošle godine, na gradskom trgu u Zaječaru. Sajam „Zdravo domaće prirodno“ se održava sa ciljem promocije tradicionalnih, domaćih proizvoda i prava je prilika za širenje tržišta prirodnih proizvoda, povećanje proizvodnje i plasmana, ali i za razmjenu znanja i iskustava. Na prošlogodišnjoj sajamskoj manifestaciji se predstavilo više od 400 proizvođača ljekovitog bilja, voća, povrća, cvijeća, piva, vina, rakije, meda, mlijeka i mliječnih proizvoda, mesa, hljeba i peciva iz svih krajeva Srbije, Makedonije, BiH, Slovenije, Hrvatske, Italije, Austrije, Bugarske, Rumunije, Slovačke, Indonezije. Prošlogodišnji Sajam finansiranja je okupio banke i osiguravajuće kuće iz regiona i šire sa ciljem da širokom auditorijumu pruže kvalitetne informacije o svojim proizvodima i uslugama namijenjene privrednicima i građanstvu. Na Sajmu turizma su se na jednom mestu okupile brojne turističke organizacije, specijalne bolnice za rehabilitaciju, banje, regionalne razvojne agencije iz Srbije i BiH. Jedan od najvažnijih ciljeva sajma turizma bio je predstavljanje turističkih potencijala, prirodnih resursa, kulturnog bogatstva i turističkih destinacija sa raznovrsnim sadržajima. Prijava za Sajam na web stranicama privrednih komora Zaječar i Tuzla.

Banjaluka: Jesenji sajam 2017, od 16. do 19. novembra

Sa zadovoljstvom Vas pozivamo da uzmete učešće na Jesenjem sajmu 2017, koji od 16. do 19. novembra organizuje Banjalučki velesajam, gdje očekujemo nastup najprestižnijih kompanija iz oblasti koje obuhvata Jesenji sajam 2017. Jesenji sajam 2017 obuhvata: 21. Međunarodni sajam poljoprivrede i prehrambene industrije - AGROS, 21. Međunarodni sajam lova, ribolova, ekologije i sporta - LORIMES, 21. Međunarodni sajam turizma i ugostiteljstva.

Poslije dvadeset godina postojanja i rada Banjalučki velesajam zakoračio je u treću deceniju. U godini jubileja izvršili smo određene promjene u strukturi i načinu poslovanja, što se pozitivno odražava i na naše rezultate, a tome u prilog najbolje govori činjenica da se broj izlagača ove godine, u odnosu na prethodnu, povećao za 44 %. Povećanje broja izlagača prati i rast broja posjetilaca za 31 %. Radi što prijatnije radne atmosfere i udobnosti za naše izlagače značajno smo unaprijedili izložbeni prostor, povećali broj parking mjesta, a u planu je i dalje proširivanje. Značajan iskorak čini i veća zainteresovanost i podrška od strane medija. Tako smo ove godine saradivali sa preko 30 radio stanica, pet tv stanica i oko 30 portala. Pored jačanja starih, ostvarili smo i nove, veoma značajne poslovne veze. Cilj nam je na sajmu napraviti mjesto okupljanja te smo planirali po prvi put Business-to-business (B2B) sastanke gdje bi investitori direktno sa izvođačima pregovarali o poslovima u predstojećoj sezoni. Budite slobodni da nam se javite i blagovremeno rezervišete svoje mjesto. Detaljnije informacije možete pronaći na web stranicama banjalučkog sajma i Komore Tuzla.

D.K.



Aktivnosti novog ministra...

Ministar Osman Puškar održao sastanak sa predstavnicima Kantonalne privredne komore Tuzla



U prostorijama Ministarstva razvoja i poduzetništva Tuzlanskog kantona održan je sastanak sa predstavnicima Kantonalne privredne komore Tuzla, na kojem je razgovarano o dosadašnjoj saradnji i budućim zajedničkim aktivnostima. Sastanku je pored ministra razvoja i poduzetništva Osmana Puškara prisustvovao predsjednik Kantonalne privredne komore Tuzla Nedret Kikanović, savjetnik premijera Tuzlanskog kantona Miralem Nuhanović i pomoćnica ministra za poduzetništvo i obrt Nisveta Osmić. Ovom prilikom je dogovoreno kreiranje zajedničke analize tržišta rada i potreba za radnom snagom na području Tuzlanskog kantona, na kojoj bi pored Ministarstva i Kantonalne privredne komore učešće uzela i Služba za zapošljavanje Tuzlanskog kantona. Takođe su prezentirane i započete aktivnosti Ministarstva na unapređenju poduzetničke infrastrukture po pitanju zakonskog okvira, budući da ne postoji pravna legislativa na području Tuzlanskog kantona i Federacije BiH, koja reguliše ovu oblast. U okviru ove tematike su dogovorene i zajedničke aktivnosti po pitanju iniciranja uspostave klastera, u kojoj će pored Ministarstva i Kantonalne privredne

komore Tuzla biti uključeni i drugi predstavnici poduzetničke infrastrukture. Istaknuta je potreba za dodatnim informisanjem i edukacijom poduzetnika sa područja Tuzlanskog kantona o dostupnim načinima finansiranja iz EU i drugih međunarodnih donatorskih fondova za finansiranje razvojnih projekata i investicija, te je u skladu s tim dogovoreno da će Ministarstvo u saradnji sa Kantonalnom privrednom komorom organizirati seminare koji će poduzetnicima omogućiti uvid u trenutno dostupne fondove za BiH, fondove za koje mogu aplicirati poduzetnici, načine pristupa navedenim fondovima, potrebnoj dokumentaciji, mogućnostima umrežavanja sa poduzetnicima iz regiona u svrhu zajedničkih aplikacija na fondove i slično. Ministar Puškar je istakao svoje zadovoljstvo po pitanju dosadašnje saradnje Ministarstva razvoja i poduzetništva i Kantonalne privredne komore Tuzla, te je dogovoren i nastavak uspješne realizacije aktivnosti u skladu sa Sporazumom o partnerskoj saradnji na unaprjeđenju privrede u Tuzlanskom kantonu, koji su Vlada Tuzlanskog kantona i Kantonalna privredna komora Tuzla potpisali u novembru 2016. godine.

Održan sastanak sa predstavnicima Obrtničke komore Tuzlanskog kantona i Obrtničke komore FBiH



Ministar razvoja i poduzetništva Osman Puškar i ministar industrije, energetike i rudarstva Srđan Mićanović održali su sastanak sa predstavnicima Obrtničke komore Tuzlanskog kantona i Obrtničke komore Federacije BiH. Tokom sastanka razgovarano je o stanju obrta na području Tuzlanskog kantona, te aktivnostima i programima ovih institucija na polju razvoja obrtništva. Sastanku su ovom prilikom pored ministara prisustvovali predsjednik Obrtničke komore Federacije BiH Željko Babić, VD predsjednik Obrtničke komore Tuzlanskog kantona Nedžad Nuhanović i pomoćnica ministra za poduzetništvo i obrt Nisveta Osmić. Ovom prilikom je konstatovano da je već duži niz godina prisutan problem nedostatka adekvatne i ažurirane baze podataka obrtnika sa područja Tuzlanskog kantona, te je dogovoreno upućivanje zajedničke inicijative prema relevantnim institucijama, prije svega Poreskoj upravi FBiH – Kantonalnom uredu u Tuzli, u cilju iznalaženja mogućnosti kreiranja funkcionalnog registra obrtnika Tuzlanskog kantona. Prezentirane su započete aktivnosti Ministarstva na unapređenju poduzetničke infrastrukture, naročito po pitanju zakonskog okvira, budući da ne postoji pravna legislativa na području Tuzlanskog kantona i Federacije BiH, koja reguliše ovu oblast. U okviru ove tematike su dogovorene i zajedničke aktivnosti po pitanju iniciranja uspostave klastera, u kojoj će pored Ministarstva i Obrtničke komore TK biti uključeni i drugi predstavnici poduzetničke infrastrukture. Na sastanku je takođe diskutovano na temu obrazovanja za obrtništvo, te je konstatovano da je u školskoj 2015/2016. godini zabilježen pad broja učenika koji su završili srednje stručne škole za zanimanja III stepena, dok je sa druge strane u školskoj 2016/2017. godini došlo do povećanja broja upisanih učenika u stručne škole za zanimanja III stepena. Iako se, u skladu sa potrebama tržišta rada nastoje uvesti i novi smjerovi obrazovanja za stručna zanimanja, i dalje na području Tuzlanskog kantona postoji značajan broj zanimanja za koje ne postoji mogućnost školovanja u redovnom sistemu obrazovanja, posebno zanimanja navedenih u Uredbi o zaštiti tradicionalnih i starih obrta. Primjetan je određen porast interesa učenika za stručna zanimanja III stepena, ali je i dalje u narednom periodu potrebno raditi na jačanju promocije obrtničkih zanimanja i usklađivanja upisne politike u skladu sa potrebama tržišta rada, a u saradnji sa Obrtničkom komorom i Službom za zapošljavanje Tuzlanskog kantona. Ministar Puškar je izrazio zadovoljstvo dosadašnjom saradnjom Ministarstva razvoja i poduzetništva sa Obrtničkom komorom Tuzlanskog kantona, te je dogovoren nastavak saradnje kroz zajedničke posjete jedinicama lokalne samouprave Tuzlanskog kantona, animiranje obrtnika za učešće na seminarima koje organizuje Ministarstvo, te organiziranje sajamskih i drugih aktivnosti u cilju razvoja obrtništva kao značajnog aspekta privrede Tuzlanskog kantona.

D.K.




Saglasnost poslanika Parlamenta FBiH...

Usvojena informacija o energetskej dozvoli za izgradnju TE “Banovići”

Vlada FBiH će informisati Parlament FBiH o svim fazama izgradnje

Na vanrednoj sjednici Predstavničkog doma Parlamenta Federacije BiH data je saglasnost na Informaciju o aktivnostima u postupku izdavanja energetske dozvole za izgradnju TE “Banovići” -blok 1-350 MW, investitora RMU Banovići. Federalni premijer Fadil Novalić, tom prilikom, izrazio je uvjerenje da će u narednih 15 dana i Elektroprivreda BiH završiti svoj dio posla vezan za ugovora o izgradnji TE Banovići. Poslanici su usvojili zaključak po kojem Parlament FBiH obavezuje Vladu FBiH, Federalno ministarstvo energije, rudarstva i industrije i RMU “Banovići” da u ime FBiH nastave aktivnosti na izgradnji TE “Banovići”, Blok 1- 350 MW. Također, usvojenim zaključkom ovlašćuje se Vlada FBiH, Federalno ministarstvo energije, rudarstva i industrije i RMU “Banovići” d.d. Banovići da u ime Federacije BiH okončaju sve aktivnosti na zaključivanju potrebnih ugovora, i o tome informiraju Parlament FBiH. Parlament FBiH obavezuje Vladu FBiH, Federalno ministarstvo energije, rudarstva i industrije i RMU “Banovići” d.d. da o svim fazama izgradnje informiraju PFBiH.



Postignut dogovor sa Vladom TK...

Rudnici ‘Kreka’ dugovanja će isplatiti na rate

Dugovanja isplaćivati u narednih pet godina, u 60 jednakih rata



Rudnici “Kreka” Tuzlanskom kantonu po osnovu obračunatih, a neplaćenih koncesionih naknada duguju više od deset miliona KM. Dogovorom s Vladom TK, Rudnici će ta dugovanja isplaćivati u narednih pet godina, u 60 jednakih rata, što bi trebalo popraviti situaciju u ovoj firmi, kažu u upravi Rudnika. Donedavno su radnici “Kreke” zbog ogromnih dugovanja prema Zavodu zdravstvenog osiguranja imali problem i s ovjeravanjem zdravstvenih knjižica. Dogovorom između Rudnika, Zavoda i Vlade TK, Rudnici će u narednih šest mjeseci isplatiti Zavodu više od dva miliona duga, uz tekuće obaveze. Tako će Rudnici “Kreka” s uplaćenim zdravstvenim osiguranjem, povećanjem prihoda i proizvodnje dočekati bolje dane, ističu u upravi Rudnika. Direktor Rudnika “Kreka” Osman Bleković je naveo da je Vlada TK imala razumijevanja, i resorno ministarstvo, u vezi s koncesijama. - Dug je bio između 10 i 11 miliona KM. Mi smo napravili sporazum da u narednih pet godina taj dio bude isplaćen - rekao je Bleković. Godinama neplaćeno zdravstveno osiguranje napravilo je dug veći od 20 miliona KM prema Zavodu zdravstvenog osiguranja, kažu u Rudnicima “Kreka”. Da bi radnicima omogućili zdravstveno osiguranje, nedavno je uprava Rudnika i sa Zavodom postigla dogovor o plaćanju dijela duga na rate. - Razumijevanje kantonalne vlade i Zavoda zdravstvenog osiguranja je dovelo do sporazuma da ostatak duga prema Zavodu isplatimo u šest jednakih rata, u narednih šest mjeseci - kazao je Bleković. Prema finansijskom izvještaju za prvu polovinu ove godine, prihod Rudnika je porastao, kao i proizvodnja, dok su troškovi i gubici nešto manji, u odnosu na isti period 2016. godine. Prema tome, Rudnici “Kreka” su napravili pozitivan pomak u radu, ističu u Upravi, što je dobra vijest za 2.560 radnika te firme.

D.K.



Iz Vlade Tuzlanskog kantona...

Potpisan Protokol o saradnji između Vlade TK i Projekta ILDP-a

Tokom sastanka predstavnika Vlade Tuzlanskog kantona i Projekta integriranog lokalnog razvoja, koji je zajednička inicijativa Švicarske Vlade i Razvojnog programa Ujedinjenih nacija Bosne i Hercegovine (UNDP BiH), potpisan je Protokol o saradnji na realizaciji treće faze Projekta integriranog lokalnog razvoja (ILDP III). Definirana saradnja će i u narednom četverogodišnjem periodu omogućiti kvalitetnu saradnju, a koja je u dosadašnjem periodu rezultirala izradom Strategije razvoja Tuzlanskog kantona za period 2016-2020. godina i prvim koracima sistemskog upravljanja implementacijom strategije. „Kao rezultat uspješne saradnje i partnerskog odnosa, u procesu izrade kantonálnih strategija razvoja, Tuzlanski kanton je imao lidersku poziciju što je rezultiralo činjenicom da je Strategija razvoja Tuzlanskog kantona za period 2016 - 2020. godina bila prva usvojena strategija razvoja, među kantonima. Isti trend naš kanton je zadržao i u procesu implementacije Strategije, što je potvrđeno i činjenicom da smo prvi izradili Izvještaj o implementaciji Strategije razvoja Tuzlanskog kantona 2016 - 2020. godina za period januar - juni 2016. godine, Operativni/akcioni plan 2017-2019. godina Strategije razvoja Tuzlanskog kantona za period 2016.-2020. godina, te Izvještaj o implementaciji Strategije razvoja Tuzlanskog kantona 2016-2020. godina za 2016. godinu. U završnoj fazi izrade je i Izvještaj o implementaciji Strategije razvoja Tuzlanskog kantona 2016 - 2020. godina za period januar - juni 2017. godine, kojeg će Vlada TK razmatrati na jednoj od narednih sjednica”, sublimirao je premijer Tuzlanskog kantona Bego Gutić, te se, zbog dosadašnje saradnje zahvalio prijateljima iz ILDP-a. Nakon pokretanja Treće faze Projekta integriranog lokalnog razvoja (ILDP III) koji ima za cilj proširenje i konsolidiranje znanja i sistema za upravljanje razvojem na lokalnom, kantonálnom i entitetskom nivou, javila se potreba za definisanjem buduće četverogodišnje saradnje između ILDP-a i njihovih partnera, među kojima je i Vlada Tuzlanskog kantona.



Predloženi Nacrt protokola o saradnji između Vlade Tuzlanskog kantona i Projekta integriranog lokalnog razvoja obuhvata područja saradnje, odgovornosti i prava partnera te definiše podršku Tuzlanskom kantonu u primjeni Zakona o razvojnom planiranju i upravljanju razvojem Federacije Bosne i Hercegovine, uključujući i podršku novom ciklusu planiranja za period iza 2020. godine. Gosti iz ILDP-a su se ovom prilikom zahvalili premijeru Gutiću i Vladi Tuzlanskog kantona na dosadašnjoj uspješnoj saradnji u okviru koje su se Tuzlanski i Zeničko - dobojski kanton pokazali kao lideri u ovoj oblasti, te izrazili očekivanje da se saradnja istim intenzitetom i kvalitetom nastavi i u okviru naredne faze Projekta. U ime Vlade sastanku su, osim premijera Gutića, prisustvovali ministar obrazovanja, nauke, kulture i sporta Zlatan Muratović, sekretar Ministarstva razvoja i poduzetništva Edin Nišić, te stručni savjetnik za nevladin sektor u Uredu premijera Senad Ovcina, dok su u ime ILDP-a to bile voditeljica ILDP-a Aida Laković Hošo i član projektnog tima ILDP-a Nasir Nalić.

Javno – privatno partnerstvo veliki potencijal regiona

Realizacija izmjena Zakona o javno – privatnom partnerstvu, koje su urađene u okviru projekat Jačanje institucija vlasti i procesa u BiH (USAID/SGIP) i obim buduće saradnje, bila je tema sastanka premijera Tuzlanskog kantona Bege Gutića sa direktorom Projekta Kristrijanom Hauptom (Christian Haupt), zamjenicom direktora Projekta Almedinom Šuvaljom i savjetnikom za javno – privatno partnerstvo Šemsom Alić. Kako je istaknuto formirana inter-resorna radna grupa, zadužena za izradu nacrtu Zakona o javno-privatnom partnerstvu (JPP), aktivno je saradivala sa predstavnicima USAID-a u izradi nacrtu Zakona, kojim je podržana priprema novog zakonskog okvira za javno – privatno partnerstvo, usklađenog sa legislativom EU, kao i pravnim i razvojnim kontekstom u Bosni i Hercegovini. Premijer Tuzlanskog kantona Bego Gutić se zahvalio predstavnicima USAID-a na dosadašnjoj saradnji, te ponovio da Tuzlanski kanton ima „veliki interes za ovu saradnju i uopšte kvalitetan tekst Zakona o javno – privatnom partnerstvu, upravo iz razloga što je naš postojeći Zakon u proteklom periodu pokazao svoje manjkavosti. Javno – privatno partnerstvo je veliki potencijal



našeg regiona i u cilju nam je što prije sagledati i otkloniti uočene nedostatke, uskladiti propise sa propisima u Europskoj uniji, te tako otkočiti realizaciju već započetih inicijativa”. Predstavnici USAID-a su ovom prilikom posebno pohvalili ažurnost rada i kompetentnost članova radne grupe, te istaknuli da su sve predviđene aktivnosti izvršene u planiranim rokovima. Na kraju sastanka premijer Gutić je rekao da je nacrt Zakona dobra osnova koja će biti razmatrana i u formi nacrtu utvrđena na jednoj od narednih sjednica Vlade Tuzlanskog kantona. „Ovaj dokument je dobra osnova koja će biti doradana i dodatno precizirana kroz javnu raspravu, tako da možemo očekivati da i Zakon bude konačno donesen do kraja ove godine” zaključio je premijer Gutić.

Odjeljenje za informisanje
Vlade Tuzlanskog kantona



5. sjednica Grupacije registrovanih obrta u poljoprivredi TK-a...

Prijeti nestanak stočnog fonda, gašenje gazdinstava

Posljednji apeli poljoprivrednika Vladi FBiH



Proljetni mraz i snijeg te avgustovske ekstremne vrućine, odnosno suša nanijele su ogromnu štetu poljoprivredi u Tuzlanskom kantonu. Dosadašnja šteta iznosi i do 70 posto zbog čega su poljoprivrednici Vladi Federacije BiH uputili upozorenje u kojem zahtijevaju isplatu zaostalih premija u iznosu od skoro 50 miliona KM i dodatnih 15 miliona maraka pomoći, u protivnom najavljuju radikalne mjere, proteste, blokade. Iznijeli su svoje stavove na 5. sjednici Grupacije registrovanih obrta u poljoprivredi TK-a koja djeluje u okviru Udruženja za poljoprivredu i prehrambenu industriju Kantonálne privredne komore Tuzla ...Muhamed Halilović, predsjednik Grupacije poljoprivrednika TK, Sekcije stočarstva i biljne proizvodnje kaže, da je ova godina za poljoprivrednike mnogo teža nego 2012. Ističe da je suša uzela svoj danak zbog čega nije ostalo ni 30 posto kvalitetne hrane za ishranu stočnog fonda. Zbog svega toga, naveo je da nije moguće postići kvalitet mlijeka po evropskim standardima.

“Proizvodnja kvalitetne hrane iz ove ide i u 2018. godinu tako da će nama i naredna godina biti veoma teška, a moguća je i pojava raznih stočnih bolesti. Te probleme nećemo moći riješiti. Zbog svega toga u ponedjeljak smo bili u Sarajevu te zatražili od Vlade FBiH da nam se isplate sredstva. Od resornog ministra Šemsudina Dedića smo dobili obećanje, međutim Federalna vlada se poslije oglasila u pisanoj formi te navela da od tih sredstava nema ništa. Bojim se da je slijedeća faza, nestanak stočnog fonda, gašenje gazdinstava, zaključavanje ruralnih domaćinstava, pojačan odlazak mladih iz zemlje”, naveo je Halilović. Zbog novonastale situacije Grupacija poljoprivrednika TK je u Tuzli i organizovala sastanak na kojem je kao jedan od zaključaka navedeno da se od Federalne vlade pored isplate zaostalih podsticaja traži i dodatnih 15 miliona maraka u cilju rješavanja trenutnih problema. “Naši poljoprivrednici se sada uzdaju u zaključak Parlamenta FBiH 15. juna ove godine, odnosno da će iz klirinskog duga bivšeg SSSR-a isplatiti poljoprivrednicima dug iz prethodnih godina, a posebno dug koji se gomilao u ovoj godini, za premije za mlijeko i bilju proizvodnju”, kazao je Suad Selimović, sekretar Udruženja za poljoprivredu i prehrambenu industriju Kantonálne privredne komore Tuzla. Svi spomenuti problemi, rekao je on, doveli su poljoprivrednike u veoma težak položaj, a postavlja se i pitanje kako održati registrovane obrte. “Ljudi

koji su ušli u registraciju obrta i koji su uposlili na svojim imanjima ljude, sada zbog elementarnih nepogoda trpe velike štete. Na kraju godine sigurno neće biti likvidni i morat će zatvoriti svoje obrte, jer bi u suprotnom ostali veoma mnogo dužni državi i dobavljačima”, dodao je sekretar Selimović. Na području TK registrovano je 430 obrta, a ukoliko se nešto ne promijeni u skorijem periodu poljoprivrednici su najavili radikalnije poteze.



“Stanje je dramatično i vjerovatno je tako u cijeloj BiH. Međutim, od Vlade FBiH očekujemo da ovaj put ispoštuje odluke Federalnog parlamenta o isplati svih podsticaja vezano za ostvarenu proizvodnju u poljoprivrednoj djelatnosti. Ukoliko se to ne desi, mi smo prisiljeni na proteste upozorenja sa mehanizacijom, na drastične mjere kako bi svima jasno dali do znanja da je kranje vrijeme za konkretnu reakciju i pomoć”, upozorio je Sadik Imamović, predsjednik Udruženja poljoprivrednika Agro-inkubator iz Kalesije.

D.K.




Predstavljamo nove članice Komore...


“Wortmann Metal”: Uspješna porodična firma!

„Za nas je uvezivanje u komorski sistem je od velikog značaja u smislu podrške, kao i direktan izvor aktuelnih informacija i predstavljanja firme u zemlji i regionu”

Iako još nije u potpunosti dovršen, novi objekat upravo u blizini zgrad Kantonalne privredne komore Tuzla, plijeni pažnju prolaznika. Neobičan, nesvakidašnji a ujedno savremen, reklo bi se čak i futuristički izgled građevine jednostavno privlači poglede i prolaznika pješaka, i učesnika u saobraćaju na sjevernoj magistrali u Tuzli. Srećom, još nismo primjetili da su pogledi, usporavanja da bi se detaljnije pogledao objekat, izazvali saobraćajne nezgode ili prometni zastoje. A kada se pogleda fotografija objekta, sasvim je jasno zašto je to tako....



Riječ je o novom objektu u Tuzli, jednom u nizu kojem, bez obzira o kakvoj je namjeni riječ, noviteti u oblasti građevinarstva skuhani u kuhinji jedne porodične firme “Wortmann Metal”, daju specifičan izgled, već ga svrstavaju u 22. vijek. A sve je počelo u prošlom vijeku kada je u porodici Delić rođena ideja da se pokrene privatni biznis i to pod uslovom da sve što budu radili, rade na najvišem nivou, profesionalno, odgovorno, na najbolji mogući način, prilagođeno zahtjevu poslovnih partnera, drugačije od ostalih. A kako je drugačije i moglo biti kada se sve zakotrljalo, kada je priča počela u Njemačkoj. **“Veliko zadovoljstvo, rekla bih sreću, pričinjava svakom čovjeku nastaviti posao svojog roditelja. Zasiurno je takav osjećaj i kod mene i mog muža jer smo ima tu privilegiju da nastavimo dobro utabanim stazama, kvalitetno određenom pravcu, ka hrabro postavljenom cilju. Naime, osnivanju naše sadašnje firme koja nosi naziv “Wortmann Metal”, prethodilo je 15 godina dugo radno iskustvo u porodičnoj firmi u Njemačkoj. Firma se zvala “Delić Industriemontagen GmbH” i bila je osposobljena za izvođenje krovopokrivačkih i fasaderskih radova, između ostalog, za firmu “Wortmann Industriebau GmbH”. I ta je saradnja nastavljena pa je ta njemačka firma učetovala**



kao suvlasnik u osnivanju firme “Wortmann-Metal”, rekla je za Komorski informator Jasna Delić udata Hodžić koja je vlasnik firme sa svojim mužem Mehmedom Hodžićem. Njih dvoje su u potpunosti preuzeli firmu, prenijeli sav teret na svoja leđa, nastavili sa radom i nastavili odlučno kročiti ka zacrtanom cilju, izgradnji jednog uspješnog poslovnog subjekta, prepoznatljive i kvalitetne firme. Ubrzo je sve došlo na svoje. Nastavljen je rad, počelo je širenje aktivnosti, djelatnosti, razvijena je grana izolaterskih radova i sistema ravnih krovova, a u protekle dvije godine se razvila i grana iznajmljivanja dizalica i kranova. Firma koja je u sadašnjem obliku i nazivu osnovana 2004. godine, registrovana je, i na tržištu već prepoznata kao kvalitetna za djelatnost izvođenja građevinskih radova. Već je u cijeloj Bosni i Hercegovini naziv “Wortmann Metal” vezan za izgradnju industrijskih i poslovnih objekata, prepoznatljiv je njihov poslovni “štih” kada su u pitanju krovopokrivački, fasaderski i limarski radovi, sve češće i šorom države za iznajmljivanje modernih i kvalitetnih dizalica i kranova a po povoljnim cijenama prilagođenim tržištu, traži se i zove “Wortmann Metal”.



“Mi smo prilično zadovoljni onim što smo postigli strpljivim i predanim radom. Naš radnici, njih ukupno 61, stalno su u pokretu, ne prestaju odgovarati, i to uspješno, zahtjevima naših kupaca u cijeloj Bosni i Hercegovini te u Srbiji. Zadovoljni su učinjenim i naši partneri a možemo istaći kako nisu krili zadovoljstvo našim radovima oni koji su među najznačajnijim partnerima kao što su Sloboprom d.o.o., Bingo d.o.o., Grafotisak, Violeta, Megamix, Swisslion, JAW Jajce. Izveli smo radove na značajnim objektima, potpisujemo radove na značajnih projektima kao što su Bingo city Centar, TC Emporium Banja Luka, KC Sveti Franjo Tuzla, Grafotisak (Grude, Tuzla, Sarajevo), Hotel Jelena Banja Luka, Brčko, Akva Park Trebinje, Hotel Nar, Hotel Bellevue Trebinje...”, ponosno ističe Jasna Hodžić. A nije da nije bilo i da nema problema pri poslovanju pa da je sve tek tako jednostavno uraditi. Nije, jer znamo i svjesni smo u kakvom okruženju danas privreda egzistira, kako je teško u Bosni i Hercegovini biti uspješan privrednik, u privratnom biznisu posebno, žena u biznisu možda i najteže. No, nedaćama se odupiru, bez upliva bilo kakve pomoći i bilo kakve vlasti a svjesni su u menadžmentu ove firme, da ima prostora, da vlasti mogu dati konkretniju podršku, koja neće završiti na praznim obećanjima.



I među rijetkima su koji ne prizivaju pomoć u podsticajima, valja da je to sad najmodernije, nego u konkretnim potezima: **“Dobro bi došla pomoć od strane vlada i opština, konkretno firmama koje pozitivno posluju i upošljavaju nove uposlenike a kroz, recimo, osnivanje zavoda za povrede na radu, koji će naplaćivati svoje usluge kao i zavod za zdravstvo, a raditi na preventivnom sprječavanju povreda, te liječenju i preuzimanju troškova, ukoliko do povrede ili smrtnog slučaja dođe, potrebna je veća briga o radnicima. Pi smo privatna firma, nismo tražili niti je bilo kakve pomoći sa strane osim što je u privatnoj inicijativi bilo slučajeva da uposlenici pojedinih banaka, npr. Sparkasse i privatni konsultanti pomažu u apliciranju za dodjelu sredstava za širenje kapaciteta firme, uvođenje standarda i sl. Nismo tražili novac, mi ga zarađujemo. Puno je prostora gdje se treba osjetiti briga države. Potrebno je aktivnije učestće u rješavanju problema u obavljanju djelatnosti kao što je nepostojanje pomenutog zavoda ili kase za liječenje povreda na radu, pa jačanje kontrole sigurnosti na gradilištu,**

problem naknade troškova liječenja, penzije, problemi nedostatka kvalificirane radne snage, manjkavost školstva. To sve da se uredi onako kako je u nekim drugim zemljama a što se pokazalo u praksi kao korisno i za privredu i za državu, bile bi najkvalitetnije i konkretne podrške opština i vlada privredi”, poručuju Jasna Hodžić.

Kada se ovako razmišlja, potpuno je razumljivo i opredjeljenje u kreiranju planova za budućnost a koje se temelji na daljem razvijanju građevinske djelatnosti, širenju tržišta, nekim većim i smjelijim iskoracima u jačanju grane iznajmljivanja i servisiranja radnih mašina. Tako je došlo i do učlanjenje u Kantonalnu privrednu komoru Tuzla: **“Nama je potrebna jedna ovakva institucija i bilo bi dobro da je komorski sistem u cijeloj Bosni i Hercegovini usklađen, podređen privrednicima i uređen ovako kako je u Komori Tuzla. Za nas je uvezivanje u komorski sistem je od velikog značaja u smislu podrške, kao i direktan izvor aktuelnih informacija i predstavljanja firme u zemlji i regionu”,** zaključuje razgovoro za Komorski informator, Jasna Hodžić vlasnica firme “Wortmann Metal”. za očekivati je da će i ova firma ubrzo postati sastavni dio sajamske postavke koju Komora Tuzla organizuje u zemlji i inostranstvu pod nazivom “Privreda TK”. Imajući u vidu da je želja vlasnika firme proširenje poslovanja u Srbiji, za očekivati je da će predstavnici firme “Wortmann Metal” biti dio “Privrede TK” na Kantonalnom privrednom komorom Tuzla već na prvom sajmu u Srbiji. Pokušat ćemo za našu novu članicu, obezbijediti kontakte i poslovne partnere već na sajmu “Zdravo – domaće – prirodno” 29. i 30. septembra u Zaječaru.

Pripremi: Dino Kalesić





Posjetili smo uspješan kolektiv...

“Prima VIP” proizvodi osvajaju tržište

Kompletirano je unutrašnje uređenje fabrike, klaonice, pokrenuta vlastita farma, izgrađen kompletno novi, savremeni objekat, osposobljena firma za sve što je potrebno procesu proizvodnje u mesnoj industriji - Distribuciju u cijeloj BiH obavlja „Piemonte“ Tuzla – Sve veći asortiman proizvoda – Pregovori sa stranim poslovnim partnerima



Izuzetan kvalitet, posebne recepture, širok asortiman, proizvode sa oznakom “Prima VIP” polako ali sigurno “guraju” na police sve većeg broja trgovinskih objekata, iz dana u dan proširuju tržište, osvajaju sve više kupaca. “Mi smo više nego zadovoljni našim prvim koracima u izuzetno zahtjevnoj industriji kakva je mesna. Znamo da u Bosni i Hercegovini

kompletan segment m-esne industrije ne funkcioniše onako kako bi trebalo, znamo i šta su poteškoće koje bi trebalo u najkraćem roku otkloniti ako bude volje, ali i pored toga, smatramo da je ovo dobar i perspektivan posao”, spremno je Kasim Selimović vlasnik MI “Prima VIP” Orašje dočekao delegaciju Kantonalne privredne komore Tuzla predvođenu predsjednikom Nedretom Kikanovićem. “Izuzetno nam je zadovoljstvo što smo upriličili posjetu jednoj ovakvoj firmi, uređenoj po najsavremenijim evropskim standardima, firmi koja ima perspektivu i zasigurno korača ka blistavoj budućnosti, izrastanju u privrednog giganta, lidera u mesnoj industriji. Tek kada su nam predloženi svi podaci vezani za nastanak firme, organizaciju, kompletan proces proizvodnje pa do konačnog proizvoda, stvorili smo jednu cjelovitu sliku, upoznali se malo bolje sa jednim kompleksnim poslom. Možemo samo čestitati vlasniku na dosada učinjenom i ponuditi u budućnosti svu podršku koju Komora može da pruži, posebno kada je u pitanju promocija svega onoga što se firmi “Prima VIP” radi i proizvodi”, izjavio je predsjednik Kikanović. A imalo se šta i vidjeti i čuti. Od farme do gotovog proizvoda, obišli smo sve uz stručnu pratnju i komentar vlasnika Selimovića koji je hrabro zakoračio u mesnu industriju, odlučno, sa idejama, od prvog dana prevazilazeći brojne poteškoće, nepravilnosti i puno toga što je prije za izjestažila i zapisnika nekih drugih institucija a ne za komorska glasila.

“Radimo puno, postigli smo puno i spremni smo za još više. Dnevno u našoj klaonici možemo pripremiti oko 100

bikova, možemo obraditi oko 20 tona mesa sa kostima. Više od 50% mesa koje koristimo za naše prerađevine dolazi sa naše farme, ostalo nabavljamo iz otkupa od domaćih proizvođača, nešto malo iz uvoza. Garantujemo kvalitetno meso za naše proizvode kojih sada ima sve više na tržištu a i asortiman je sve veći. Distribuciju u cijeloj

BiH naših proizvoda obavlja sestrinska firma “Piemonte” Tuzla pod čijim okriljem je i nastala firma “Prima VIP” Orašje. Ne zadovoljavamo se samo tržištem BiH. U stalnim smo kontaktima, pregovorima, dogovorima, sa partnerima iz Srbije, razgovara se o izvozu mesa za Rusiju, počeli smo pregovore za izvoz prerađevina u Kuvajt. U Kuvajtu su naši proizvodi prepoznati kao kvalitetni i sigurno je da će dobiti prednost u odnosu na ono što su tamo do sada konzumirali

a to su bili uglavnom proizvodi lošeg kvaliteta mesa iz Brazila, Argentine. Imamo viziju, cilj, radimo naporno, ne tražimo nikakvu pomoć, podsticaje, tek, neophodno nam je, kao i cijelokupnoj bh privredi, olakšavanje poslovanje, pojednostavljenje procedura, smanjenje doprinosa a spremni smo nastaviti potpuno zakonski poslovati, doprinosti razvoju i jačanju države, otvoriti nova radna mjesta”, zaključuje i poručuje Kasim Selimović.



Podsjetimo da je M.I. “PRIMA VIP” Orašje locirana u Posavskom kantonu koji je ujedno i najveća sirovinna baza u BiH za proizvodnju hrane. Izgrađena je na parceli površine 31 000 m2 sa kompletnom infrastrukturom neophodnom za obavljanje registrovane djelatnosti. U oktobru 2016. godine firmu je kupila kompanija “Piemonte” d.o.o. Tuzla koja u svom vlasništvu ima lanac trgovačkih marketa, distributivnu mrežu koja pokriva cijelu BiH i kompanija koja je prva izvezla značajne količine junećeg mesa za Republiku Tursku u 2015. godini, inače, firma članica Kantonalne privredne komore Tuzla a vlasnik i direktor firme Kasim Selimović je predsjednik Odbora komorskog Udruženja za trgovinu, ugostiteljstvo i turizam. Menadžment kompanije “Piemonte” je u veoma kratkom roku izvršio ozbiljan zahvat renoviranja, izgradnje i usavršavanja kompletne linije klanja, iskoštavanja i nabavku nove opreme za kompletnu prerađevu suhomesnatih proizvoda. Značajnim finansijskim ulaganjima kompletirano je unutrašnje uređenje fabrike, klaonice, pokrenuta vlastita farma, izgrađen kompletno novi, savremeni objekat, osposobljena firma za sve što je potrebno procesu proizvodnje u mesnoj industriji gdje ciklus proizvodnje koji počinje klanjem životinje, rasijecanjem i iskoštavanjem mesa, pripremom mesa za prerađevu, prerađevu mesa, pečenje ili sušenje proizvoda, vakumiranje i pakovanje, skladištenje i isporuka gotovih proizvoda.

Čak je u novoizgrađenom dijelu objekta instalirana i savremena oprema za proizvodnju KAVURME namijenjene za Tursko tržište. Trenutni kapaciteti objekta gledano kroz raspoloživu korisnu površinu su preko 6500,00 m2 korisne namjenske uređene i funkcionalne površine sa dodatnim pratećim objektima neophodnim za obavljanje djelatnosti. Klaonica posjeduje dvije linije klanja: linija za krupnu stoku i linija za sitnu stoku (ovce i koze). Dnevni kapaciteti klaonice su 150 do 200 grla krupne stoke, rashladni kapaciteti su u mogućnosti uskladištiti preko 300 grla krupne stoke na dnevnoj bazi, dok objekat raspolaže i hladnjačom šokericom (-40) kapaciteta 2 t. a hladnjače za režim -200 C mogu da preuzmu količinu zaleđenog mesa do 200 tona. Tu su i komore za otapanje zamrznutih proizvoda i komore za uskladištavanje gotovih proizvoda kapaciteta 100 t. Objekat posjeduje sve potrebne dozvole za proizvodnju proizvoda za domaće tržište i dozvolu za proizvodnju proizvoda namijenjenih za izvoz, posjeduje HACCP standard i HALAL standard/certifikat. Najviše aktivnosti oko obezbjeđenja svih standarda i sertifikata vodio je suvlasnik Muamer Selimović: “Zadovoljni smo svim učinjenim i drago nam je što smo dobili Halal sertifikat čime je potvrđena naša opredjeljenost da radimo kvalitetno i u skladu sa propisima. Mesna industrija posjeduje i HACCP sertifikat koji osigurava da je hrana ove kompanije u potpunosti ispravna za upotrebu i da je u svakom procesu obrade urađeno sve u skladu sa propisima. Halal certificiranjem obuhvaćene su mesne prerađevine od junećeg, goveđeg i pilećeg halal mesa, a na ambalaži proizvoda Mesne industrije “Prima Vip” bit će naznačeno da posjeduje Halal sertifikat”.

U asortimanu se po veoma povoljnim cijenama nalazi niz proizvoda visokog kvaliteta, riječ je o više vrsta parizera, kobasica, hrenovki, blagi i ljuti kuletni kao poslastica, sudžuk, goveđa čajna kobasica, jeger kobasica, specijaliteti goveđi jezik, dimljeni pileći file, bosanski pršut od najkvalitetnijeg mesa. Dakle, puno razloga za posjetiti prodajne objekte “Piemonte”, istražiti i izabrati u korpu proizvoda najviše onih sa oznakom “Prima VIP” Orašje.





Privredni servis – vijesti iz privrede...

Tenderi otežavaju obnovu Aerodroma Tuzla




Realizacija prve faze projekta proširenja i rekonstrukcije putničkog terminala na Međunarodnom aerodromu Tuzla trebala je početi u julu, ali je zbog nejasnoća oko tenderske procedure i prispjele dokumentacije sve prolongirano. Iako je kašnjenje evidentno, direktor Aerodroma Rifet Karasalihović kaže da se ovo neće loše odraziti na planove, niti na tekuće poslovanje. - Bilo je nekih nejasnoća, ali komisija za provođenje tendera je zatražila asistenciju od Agencije za javne nabavke i vjerujemo da će to vrlo brzo biti gotovo, kazao nam je Karasalihović. Nakon što se objedini dokumentacija, onda slijedi i konačan izbor izvođača, što

je najnesigurniji dio svake tenderske procedure. Upravo od ovoga zavisi da li će bilo koji projekat biti započet i završen na vrijeme. „Mi tek trebamo izabrati najpovoljnijeg izvođača za prvu fazu projekta, a to je proširenje terminala prema sjevernoj strani, odnosno platformi Aerodroma, i što se nas tiče, mi možemo odmah nakon toga početi s radovima. Međutim, moramo vidjeti hoće li biti žalbi i koliko će to potrajati“, dodao je Karasalihović. Projekat proširenja zgrade terminala MAT-a odvijat će se u narednih nekoliko mjeseci, a druga faza, odnosno tender za njenu realizaciju tek treba biti raspisan. Ukupna vrijednost radova je oko 6,5 miliona maraka, a najveći dio sredstava je već osiguran. „Mi smo finansijski projekat zatvorili sa 70 posto sredstava, ali vjerujemo da nećemo imati nikakvih problema, jer pomoć i kantonalne i federalne vlade je sasvim izvjesna“, kazao nam je Karasalihović. Kada budu završena oba projekta proširenja, koji neće uticati na svakodnevne operacije na Aerodromu, kapacitet Tuzlanskog aerodroma bit će povećan za više od 200 hiljada godišnje, odnosno iznositi će oko 700 hiljada putnika tokom jedne godine.

Sa MAT-a se donedavno avionima WizzAir moglo letjeti na 16 evropskih destinacija, međutim, linija za London - Luton, iako je najavljena kao redovna, više neće biti dio ponude sa ovog aerodroma. Zvanični razlozi će biti poznati nakon sastanka sa upravom WizzAir krajem avgusta, ali mogući razlozi su komplikovane procedure prilikom dobijanja viza za Veliku Britaniju. „Vidjet ćemo je li linija ukinuta samo tokom zime, ali razlog nije zainteresovanost, jer avion je bio zadovoljavajuće popunjen dok je letio za London“, dodao je Karasalihović.

Tuzlanski kanton naplatio od koncesija koliko svi ostali kantoni zajedno



Prihodi Tuzlanskog kantona od naplate koncesionih naknada iznose oko 5,6 miliona maraka godišnje, više nego svih ostalih kantona zajedno u Federaciji koji imaju naplatu od 5,1 milion, izvijestila je BHRT. Pored toga što taj kanton važi kao jedan od najbogatijih, pogotovo rudnim bogatstvima, mineralnim ležištima i vodom, čini se da je i daleko najorganizovaniji u segmentu dodjela koncesionih ugovora i njihovih naplata. Punionica flaširane vode Bistrik iz Devetaka iz Lukavca, koja postoji od 2005. godine, koncesioni ugovor sa Vladom TK potpisala je prije dvije godine i od tada bilježi porast prodaje flaširane voede. U prošloj godini prodali su oko 800.000 litara, dok se u ovoj godini očekuje promet od 1,1 milion litara flaširane vode. - Imamo efekte od sklapanja koncesionog ugovora u smislu povećane prodaje. U posljednje dvije godine naša prodaja se povećava do 30 posto, a prethodno smo imali porast od 5-6 posto. Primjećujemo da ima efekta od koncesije. Više smo zastupljeni u medijima, navodi

se da smo ovlašteni distributer i da koristimo prirodna bogatstva BiH. To su domaći potrošači prepoznali kao domaći brand i više nas konzumiraju. Samim tim više i prodajemo, kazao je Miralem Gasal zamjenik direktora firme Papago, koja je proizvođač vode Bistrik. Prema izvještaju o radu Komisije za koncesije TK, najviše koncesija, čak 20, odnosi se na korištenje vode, zatim slijedi eksploatacija krečnjaka sa 9 koncesija, te eksploatacija kvarcnog pijeska sa tri. Četiri koncesije odnose se na manje hidroenergetske objekte, a samo tri za korištenje uglja - dvije za mrki i jedna za lignit. Prihod od koncesija je projektovan na oko 5,6 miliona KM, što je za oko 0,5 miliona KM više nego od svih ostalih kantona zajedno u Federaciji. Iako su prihodi najveći od rudnika, koji su i najveći dužnici, očigledno je da ovaj kanton ima najbolju strategiju o dodjeli koncesija u BiH. Ministar finansija TK Jakub Suljkanović kaže za BHT da je Tuzlanski kanton, kad je u pitanju prihod od koncesija lider na području Federacije i u smislu fakturisanog iznosa prihoda i u smislu naplate koncesija. Dvadeset posto prihoda od naplaćenih koncesija ide Kantonu, a 80 posto lokalnoj zajednici na čijem teritoriju se nalazi resurs koji je predmet koncesije. Dodaje da se najveći dio nenaplaćenih prihoda odnosi na rudnike uglja - Kreka i Đurđevik. Dug TK po osnovu koncesija iznosi oko 13 miliona KM, od čega 90 posto otpada na rudnike. Rudnik Kreka ima dug od 11,2 miliona KM, ali kao preduzeću od velikog značaja za ovu regiju, pa i državu, Vlada TK nije htjela koristiti represivne mjere. Nakon zajedničkog sastanka dogovoren je plan otplate u narednom periodu koji je zadovoljio sve strane.



Fabrika cementa Lukavac okončava ulaganja od 25 miliona KM

Fabrika cementa Lukavac u svom opredjeljenju da prati moderne tehničko-tehnološke tokove koji osiguravaju visoke ekološke standarde uspješno privodi kraju završnu fazu investicija u projekte, čiji je cilj povećanje kapaciteta, efikasnosti, procenta učešća alternativnog goriva u procesu proizvodnje klinkera. Poznat i kao Zelena fabrika cementa, Lukavac cement okončava treću investicionu fazu (2013. – 2017.) ukupne vrijednosti od preko 25 miliona KM, kojom će se značajno doprinijeti poboljšanju proizvodne efikasnosti, sigurnosti i unapređenju postojećih ekoloških pokazatelja. Ulaganja su prvenstveno bila usmjerena na korištenje alternativnih goriva i ekološke standarde, odnosno na nabavku nove opreme i nadogradnju sistema za doziranje alternativnih goriva na toplom dijelu linije za proizvodnju klinkera, modernizaciju i proširenje postrojenja za bajpas prašinu te ugradnju sistema za redukciju azotnih oksida, navodi se u saopćenju firme. „U proteklom periodu započeli smo izgradnju postrojenja za redukciju azotnih oksida, čime se stvaraju uslovi da zakonsku granicu od 500 mg/Nm3 spustimo na 200 mg/ Nm3, a napominjemo da zakonska regulativa u BiH propisuje maksimalnu vrijednost azotnih oksida 500 mg/Nm3. Očekuje se da će se, u nekim evropskim zemljama ta granica pomjeriti na 200 mg/ Nm3 pa je za pretpostaviti kako će se isto desiti i u Bosni i Hercegovini. Ulaganjem u ovu opremu, Fabrika cementa Lukavac ide ispred vremena i trenutnih ekoloških zahtjeva. Proteklih mjeseci smo aktivno radili na demontaži stare i montaži nove opreme, ispitivanju i optimizaciji. Sada smo spremni za puštanje u rad. Radovi su započeli u aprilu, a unatoč raznim vremenskim uslovima, predviđeni rok za navedene poslove se ispoštovao“, istakao je Nedim Pašić, direktor proizvodnje u Fabrici cementa Lukavac. U ukupnoj svjetskoj proizvodnji stakleničkih plinova, cementna industrija generira 5% emisija CO₂, a svoj doprinos smanjenju svjetskog zagrijavanja daje poduzimajući aktivnosti posebno u segmentima smanjenja udjela klinkera u cementu, podizanjem energetske učinkovitosti, većom upotrebom zamjenskih goriva i alternativnih sirovina, te promoviranjem održive gradnje kao jednog od preduvjeta prilagođavanja posljedicama klimatskih promjena. Lukavac cement smatra svojom obavezom da stalno traži rješenja i ulaže u nova znanja i tehnologije kako bi uspješno pratio svjetske trendove i osigurao visoke ekološke standarde. Upravo slijedi period puštanja novih postrojenja u rad, početak proizvodnog ciklusa, a nakon stabilizacije rada pristupit će se dokazivanju garantnih parametara. Fabrika cementa Lukavac d.d. vodeći je proizvođač portland i zidarskog cementa u Bosni i Hercegovini. Od 2001. godine članica je ugledne poslovne grupe Asamer iz Austrije. Svojim inovativnim pristupom, strategijom kontinuiranog ulaganja u najsavremenije tehnologije još 2008. je proglašena najvećom „green field“ investicijom i „Najboljim stranim investitorom“ u BiH. Svojim odnosom i zalaganjem za očuvanje životne okoline stekla je naziv „Zelena fabrika cementa“ koji se temelji na certifikatima ISO 9001:2008 i ISO 14001:2004, u skladu sa najboljim evropskim praksama i standardima.



Boxmark u Lukavcu želi proširiti kapacitete



Planovi za poslovni razvoj kompanije Boxmark, izgradnja novih proizvodnih kapaciteta, a time i otvaranje novih radnih mjesta, bili su tema sastanka premijera Tuzlanskog kantona Bege Gutića s direktorom Boxmarka Matejem Bastićem. Kako je rekao Bastić, kompanija za proizvodnju tekstilnih i kožnih dijelova za autoindustriju, „Boxmark“, u skorijoj budućnosti planira proširenje svojih proizvodnih kapaciteta u Lukavcu. To, prije svega, podrazumijeva izgradnju nove proizvodne hale od oko 10.000 m², a što je prva faza ukupnog investicijskog projekta koji bi trebao da rezultira otvaranjem oko 800 novih radnih mjesta u ovoj kompaniji. Tokom sastanka razgovarano je o procedurama izdavanja neophodnih dozvola i saglasnosti, kako bi se u što skorije vrijeme moglo početi i sa konkretnim radovima. - „Boxmark“ se dosad pokazao kao jedan od najozbiljnijih poslovnih investitora u Tuzlanskom kantonu, i kao takvom, Vlada će učiniti sve što je u našoj moći da sve neophodne procedure za izdavanje dozvola okončamo u najkraćim mogućim rokovima - rekao je Gutić.

Napomenuo je da njihov dobitak i cilj u ovom slučaju predstavlja oko 800 novih radnih mjesta te da će u tom pogledu svi kapaciteti Vlade TK i resornih ministarstava biti stavljeni u funkciju realizacije ove investicije. Dodao je da će Vlada TK kao partner pomoći „Boxmarku“ i u komunikaciji sa drugim poslovnim partnerima, prije svih BH Telekomom i Elektroprivredom Bosne i Hercegovine, da se ispune svi neophodni preduslovi za realizaciju ovog projekta, saopćeno je iz Odjeljenja za informiranje Vlade TK.

D.K.



Gradska uprava u službi zapošljavanja...

U Tuzli za godinu dana otvoreno 1.700 novih radnih mjesta

Najavljeno još najmanje 125 novih radnih mjesta

Na području Tuzle u proteklih godinu dana kroz realizaciju nekoliko projekata otvoreno je 1.700 novih radnih mjesta, a pozitivan trend bit će nastavljen i u narednom periodu, s obzirom da je najavljeno kreiranje najmanje još 125. Novih 1.700 radnih mjesta otvoreno je uz pomoć Gradske uprave Tuzle koja je iz gradskog budžeta za prošlu godinu izdvojila 100.000 KM za otvaranje novih radnih mjesta, a trend zapošljavanja bit će nastavljen i u 2017. s obzirom da su osigurana novčana sredstva u iznosu od 450.000 KM. Vedran Lakić, šef Službe za ekonomski razvoj i društvene djelatnosti Gradske uprave Tuzle kaže da će spomenuti iznos sredstava u toku ove godine biti utrošena kroz četiri projekta "Zapošljavanje i nova radna mjesta", "Siguran start", "Zapošljavanje ranjivih kategorija" i "Školovanje za sigurno zaposlenje".



"Za prvi projekat obezbjeđeno je 250.000 KM gdje se 2.000 KM daje po jednom novom radnom mjestu i moram reći da su 64 poslovna subjekta finansijski obezbjeđena od gradskog budžeta za 125 novih radnih mjesta", istakao je Lakić. Projekat "Siguran start" ove godine se prvi put realizira na području Tuzle, a kroz gradski budžet obezbijedena su sredstva u iznosu od 150.000 KM. Ovim projektom nastoji se povećati broj i održivost novoregistrovanih samostalnih djelatnosti i pravnih lica na području Tuzle, s ciljem povećanja zaposlenosti, a njime je, između ostalog, predviđena podrška na ime refundiranja trškova registracije firme, sufinansiranja troškova doprinosa za PIO i zdravstveno osiguranje te osiguranje od nezaposlenosti za registrovanu djelatnost. **"Projekat se odnosi kako na društva s ograničenom odgovornošću, tako i na obrte kao najniži oblik organizovanja. Ovdje smo ponudili do 3.000 KM pomoći za pravna lica kroz različite vrste podrške, jer smo analizom privrede i u komunikaciji s privrednim sektorom dobili potrebe u vidu plaćanja zakupnine za poslovne prostore koje bi koristili početnici, u smislu naknade za troškove informacionih, marketing i računovodstvenih usluga, odnosno nabavke opreme koja im je potrebna za početak rada i druge obaveze"**, pojasnio je Lakić, naglasivši da je za 36 aplikatana utrošeno 150.000 KM. Lakić je dodao i da na program "Zapošljavanje ranjivih kategorija" nije pristigla nijedna prijava, ali će se iz Gradske uprave potruditi da i ova stavka bude realizirana, odnosno da osobe s invaliditetom budu zaposlene, a da privredu animiraju u smislu primanja u radni odnos osoba koje pripadaju ovoj skupini. U narednih nekoliko sedmica započet će se i sa realizacijom projekta "Školovanje za sigurno zaposlenje" koji podrazumijeva stipendiranje učenika koji upišu neko od deficitarnih zanimanja. Za ovu namjenu postoje sredstva u

iznosu od 25.000 maraka. "Iz godine u godinu vidimo koliki je jaz između onoga što se školuje u našim srednjim školama i potreba privrede, tako da kroz ovu finansijsku animaciju želimo podstaknuti roditelje i njihovu djecu da upišu ona zanimanja koja su potrebna tržištu rada", dodao je Lakić.



Gradonačelnik Tuzle Jasmin Imamović kaže da je postignutim rezultatima u proteklom periodu ostvaren dio obećanja koje je dao u 2016. godini. **"Prošle godine, u ovo doba sam dao obećanje da će u četiri godine biti otvoreno četiri hiljade novih radnih mjesta. Od 1. maja 2016. do 1. maja 2017. otvoreno je 1.700 novih radnih mjesta, uz pomoć naših poticaja u kojima firmi dajemo po dvije hiljade maraka po osobi"**, naglasio je Imamović. Na sjednici Kolegija gradonačelnika Tuzle najavljeno i kreniranje određenog broja radnih mjesta u industrijskoj zoni Kreka-Sjever na kojoj bi uskoro trebala početi izgradnja prvih objekata.

D.K.



Novi iskorak u firmi „Imel“...

Pokretanje agroproizvodnje i uzgoja koza

Proizvodi od kozjeg mlijeka i organski uzgojeno povrće sa dostavom na vašu adresu



Zbog sve veće zastupljenosti hrane sumnjivog kvaliteta na našem tržištu i zanemarivanja proizvoda od kozjeg mlijeka, koje je daleko kvalitetnije i zdravije od kravljeg mlijeka, kompanija Imel iz Lukavca se 2016. godine odlučila za kupovinu 25 godina zapuštenog zemljišta na planini Ozren, nakon čega je krenula sa pokretanjem agroproizvodnje i uzgojem koza.

Cilj je razviti domaće, organske proizvode u ruralno nerazvijenoj lokaciji Milino Selo koje je čisto, zaštićeno i neotkriveno područje sa velikim potencijalima za razvoj mnogobrojnih eko turističkih usluga. **"Na parceli površine 30 ha, uzgajamo stado od 250 koza francuske pasmine Alpina, a taj broj će se sigurno kroz godine rada povećavati. Želja nam je da kroz naše proizvode podsjetimo na zaboravljene tradicijske vrijednosti a sve to uz očuvanje i poštivanje prirode i okoliša"**, izjavila je Amra Brkić, marketing menadžer kompanije Imel. Farma Milo Selo za sada u ponudi ima svježe kozje mlijeko i sirutku, od sireva tu su svježi, dimljeni i tvrdi kozji sir. Također, tu je i skuta od kozje sirutke koja je jedinstven proizvod na našem tržištu. Naime, skuta je sir od sirutke i poseban je zbog visokog sadržaja proteina. U ponudi će uskoro biti i specijalni tvrdi sir sa biberom, kozji sir u hrastovoj kori koji ima izuzetno ljekovita svojstva i sir u maslinovom ili suncokretovom ulju. Kompletna proizvodnja proizvoda zaokružena je u integrativni model tako da se koze



hrane organskom hranom, koja je uzgojena na farmi.

"Pored proizvoda od kozjeg mlijeka, farma Milo Selo posjeduje platenike površine 1000m2 kako bi mogli proizvoditi organsko plateničko povrće kao što su paradajz, paprike, salata, luk.... Riječ je o proizvodima koje na našem tržištu možemo pronaći uglavnom tretirane ili uzgojeno kao GMO hrana, dok su naši proizvodi organski proizvedeni metodama koje ne uključuju pesticide i hemijska gnojiva, ne sadrži genetski modificirane organizme i nisu tretirani zračenjem ili hemijskim aditivima", kazala je Amra Brkić i dodala: **"Svakako, naš glavni cilj trenutno je okončati certifikaciju za organsku proizvodnju i proširiti tržište za naše proizvode. A naš naredni zadatak je završetak gradnje hladnjače za organsko povrće i proizvodnja novih vrsta sireva"**, rekla je Brkić.



Na farmi vjeruju da je organska proizvodnja budućnost Bosne i Hercegovine te ističu da imaju veliku podršku lokalnog stanovništva, koje je prepoznalo cilj i kvalitet proizvoda što im garantuje svjetlu budućnost u Bosni i Hercegovini, a sigurno i regiji. Građani Tuzle proizvode mogu kupiti direktno u Deli dućanu u Tuzli na adresi Maršala Tita 60 ili posjetiti farmu u Milinom Selu (općina Lukavac). Također, proizvode farme Milo Selo moguće je naručiti tokom cijele sedmice na kućnu adresu a isporuka je petkom od 09:00 sati, dok se narudžbe primaju do četvrtka putem broja telefona 061 175 258 ili Facebook stranice www.facebook.com/farmamiloselo.


D.K.



Uskoro izgradnja u proizvodnoj zoni Kreka sjever...

Gradnja i proizvodnja na atraktivnoj lokaciji u Tuzli

U novoj proizvodnoj zoni u Tuzli pravit će se dječije igračke i Pradine cipele, Kabilova peciva



kompleksa. Iz budžeta Tuzle dosad je uloženo blizu 700.000 KM kako bi se omogućili neophodni komunalni priključci za normalno funkcionisanje objekata koji budu izgrađeni. Prilikom kreiranja ovog projekta poseban akcent stavljen je na model funkcionisanja zone koji je jedinstven u BiH, a po povoljnim uslovima omogućava investitorima otvaranje novih, ali i širenje već postojećih kompanija za određenu proizvodnju. Naime, sve kompanije koje su zainteresirane za pokretanje proizvodnje u ovoj zoni, a kojoj prethodi izgradnja proizvodne hale, parcele koje su u vlasništvu Grada Tuzle ne kupuju, već ih uzimaju u dugogodišnji zakup. Da bi im parcela uz minimalnu zakupninu bila ustupljena na korištenje potrebno je da Gradskoj upravi daju garanciju koja se ogleda u kreiranju najmanje jednog novog radnog mjesta na 100 kvadratnih metara dobijene parcele. Zainteresiranost investitora za izgradnju proizvodnih hala već postoji, a kako je potvrđeno iz Gradske uprave Tuzle, tri firme će uskoro potpisati ugovore o zakupu parcele koje su im pripale nakon apliciranja na objavljeni javni konkurs. Konačnu odluku o dodjeli parcela na jednoj od ranijih sjednica donijelo je Gradsko vijeće Tuzle. **„Prvi korisnici parcela u poslovnoj zoni Kreka sjever već su odabrani. Riječ je o tri firme iz oblasti proizvodnje koje će u narednih nekoliko dana potpisati ugovore, a koji će važiti 40 godina. Kroz razgovore sa predstavnicima firmi saznali smo s kojim kapacitetima raspolažu”,** rekao je šef Službe za ekonomski razvoj i društvene djelatnosti Gradske uprave Tuzle Vedran Lakić. On je otkrio i da je riječ o pekari Kabil koja se bavi proizvodnjom peciva i pekarskih proizvoda, zatim Koala Automotive – firma za proizvodnju igračaka za djecu koja je u cijelosti izvezno orjentisana te kompaniji Progetti Bosnia koja se bavi proizvodnjom ženske obuće renomiranog svjetskog brenda Prada. „Planirano je zaposlenje najmanje 100 radnika na ove tri parcele, a s obzirom da je riječ o veoma kvalitetnim i postojećim firmama, očekujemo da će broj novouposlenih biti znatno veći, najmanje za dva puta od planiranog”, naglasio je Lakić. Prema ranijim najavama, u poslovnoj zoni Kreka sjever u narednom periodu svoje proizvodne kapacitete trebalo bi premjestiti ili proširiti blizu 30 firmi.



D.K.



Solani odobren GC-MARK® certifikat ...

„Solana“ Tuzla prva bh kompanija sa GC-MARK® oznakom

Solana, prvi bh proizvođač koji zadovoljava njemačke prehrambene standarde



Solana d.d. Tuzla je prva BH kompanija koja je ovlaštena da nosi GC-MARK® oznaku za higijenu svojih proizvoda. Naime, od strane auditora DQS CFS German Association for Sustainability, Solani d.d. Tuzla je odobren GC-MARK® certifikat kojim se verifikuje da u potpunosti primjenjuje načela HACCP standarda (analiza opasnosti i kritičnih kontrolnih tačaka) kako je definisano u Codex Alimentarius. GC-MARK® certifikatom, te istovremenim pravom isticanja ove oznake na svojim proizvodima, Solana d.d. Tuzla se svrstava u red najrespektabilnijih evropskih kompanija koje obezbjeđuju vrhunski kvalitet svojih proizvoda odnosno najviši nivo sigurnosti istih sa aspekta higijenske kontrole počev od procesa proizvodnje, sistema transporta i skladištenja, te distribucije proizvoda. No, Solana ovim „priznanjem“ još jednom potvrđuje neupitno opredjeljenje da kontinuiranim unapređenjem kvaliteta svojih proizvoda i njihovom sigurnošću u potpunosti implementira politiku permanentne brige o svojim potrošačima, kao dijela dugoročne korporativne strategije.

D.K.



Dioničari Solane raspodijelili dobit, uvodi se prokura

Dioničari društva Solana d.d. Tuzla usvojili su na Skupštini održanoj 30. juna odluku o raspodjeli dobiti ostvarene u 2016. godini. Prema usvojenoj odluci 452.216 KM izdvaja se u obavezne rezerve, dok se ostatak od 194.278 KM raspoređuje u akumuliranu dobit. Na Skupštini je većinom glasova usvojen godišnji finansijski izvještaj o poslovanju društva za 2016. godinu, uključujući izvještaje vanjskog revizora, izvještaje o radu Nadzornog odbora i Odbora za reviziju. Usvojena je odluka o izboru računovodstvene kuće Deloitte za vanjskog revizora za 2017. godinu. Također, po zahtjevu dioničara ZIF MI-GROUP d.d. Sarajevo i ZIF Naprijed, koji su zatražili izmjene Statuta društva, dioničari su donijeli odluku o uvođenju prokure u društvo.



Najsavremeniji u BiH...

Pivara Tuzla u rad pustila sisteme za CO2 i pakovanje proizvoda

Stanica za CO2 najsavremenija u BiH i ispunjava sve standarde Evropske unije



U proizvodnim pogonima Pivare Tuzla su u rad puštena dva nova savremena sistema koja će doprinijeti većoj produktivnosti ove fabrike. Riječ je o stanici za CO2 i najsavremenijoj liniji za PET program koja se koristi za pakovanje proizvoda, čija je investicijska vrijednost 2.500.000 konvertibilnih maraka. Puštanje u rad ovih sistema uslijedilo je nakon proširenja i asfaltiranja kruga kompanije i rekonstrukcije dijela proizvodnog objekta. U prvom kvartalu ove godine kroz svoj investicijski ciklus Tuzlanska pivara utrošila je više od 500.000 KM, a do kraja ove godine predviđena je realizacija projekata u iznosu većem od pet miliona maraka. **“S ponosom mogu reći da je stanica za CO2 najsavremenija u BiH i ispunjava sve standarde Evropske unije. S druge strane, imamo i najsavremeniju opremu pomoću koje se radi kompletna linija kada je riječ o PET programu. Tu se pakuju svi proizvodi, od piva, preko mineralne vode do sokova različitih okusa. Također, tu se rade i proizvodi koji odlaze van granica BiH”,** rekao je medijima direktor Tuzlanske pivare Fahrudin Salihović. Inače, proizvodi Pivare Tuzla već dvije godine su zastupljeni u Turskoj, a najavljenim ulaganjima u proizvodnom procesu menadžment ove kompanije želi izaći i na brojna druga tržišta izvan granica BiH. **“Mi se polako, sigurnim koracima, pripremamo za izlazak na nova tržišta”,** poručio je Salihović, naglasivši da se ova kompanija trenutno nalazi među 100 najboljih u našoj zemlji. Svečanom puštanju u rad novih sistema prisustvovao je i gradonačelnik Tuzle Jasmin Imamović koji je tom prilikom ocijenio da ova kompanija predstavlja važan motor razvoja BiH u cijelosti. Ministar trgovine, turizma i saobraćaja TK Mirsad Gluhic prilikom obilaska novih sistema istakao je da ulaganje u proizvodnju predstavlja i širenje broja radnih mjesta. On je naglasio i da Tuzlanska pivara predstavlja školski primjer kako treba ulagati u proizvodnju.



RK Invest Sarajevo kupio 51 posto dionica Pivare Tuzla

RK Invest d.o.o. Sarajevo stekao je 51,0 posto vlasništva u Pivari Tuzla nakon što je dionice prodala Sberbank d.d. (skrbički račun), izvještava Indikator.ba. Ovim je došlo do preprodaje udjela u Pivari Tuzla budući da je istovjetni udio već kupljen sredinom maja, kada je obavljena transakcija većinskim paketom dionica ove kompanije. Dionice su tada prodali ZIF Naprijed, ZIF BIG-Investiciona grupa d.d. Sarajevo, OIF LILIUM BALANCED i ZIF “MI-GROUP” d.d. Sarajevo, a kupio investitor koji posluje putem skrbičkog računa Sberbank d.d. Kao mogući kupac u medijima je navođen fond Altima Partners (vlasnik Banjalučke pivare) ali te informacije nisu potvrđene. Kao osnivač društva RK Invest d.o.o. Sarajevo u sudskom registru navodi se društvo Sagena Investment Establishment sa sjedištem u Vaduzu, Liechtenstein. Sagena je od ranije aktivna na tržištu kapitala u BiH, a posjeduje dionice u Energonovi d.d. Sarajevo 8,3 posto i društvu OZON d.d. Travnik 0,15 posto.

D.K.



Privredni servis – Vijesti iz privrede...

U Tuzlanskom kantonu sve više turista



Na području Tuzlanskog kantona bilježe se pozitivni rezultati u oblasti turizma, te u ukupnom turističkom prometu. U prvoj polovini 2017. godine Tuzlanski kanton je posjetilo 20.220 turista koji su ostvarili 52.701 noćenje, što predstavlja povećanje broja noćenja za 2,1 posto u odnosu na isti period prošle godine, a povećan je broj posjeta stranih turista ovom kantonu, naročito tokom ljetne sezone. Vršilac dužnosti direktora Turističke zajednice TK Miralem Mešković istakao je da je grad Tuzla prva turistička destinacija na području TK po svim parametrima, koji se odnose na smještajne kapacitete i koji se mjere ostvarivanjem ukupnog turističkog prometa.

Najveći “biser turizma” je kompleks Panonskih jezera u ovom gradu. U Tuzli je ostvareno oko 50 posto noćenja od ukupnog broja, a značajno mjesto zauzima i opština Gradačac. Po Meškovićevim riječima, ostale opštine takođe imaju svoju ulogu u kreiranju ukupne turističke ponude, a turisti se interesiraju i posjećuju prirodno nasljeđe, jezera i sakralne objekte svih konfesija. Tvrdi da turisti mnogo posjećuju srednjovjekovni kraljevski grad Srebrenik, te Gradačac, ali i zaštićeno područje planine Konjuh. Pored povećanja broja posjeta i noćenja, na području ovog kantona u stalnom porastu je i potrošnja u turizmu i ugostiteljstvu. Mešković ističe da se na najmnogoljudnijem kantonu godišnje u prosjeku ostvari oko 23 miliona KM potrošnje, u turizmu i ugostiteljstvu, s tendencijom da se taj iznos udvostruči, imajući u vidu postojeće turističke potencijale. Navodi da je razvoju turizma na području TK doprinijela i ekspanzija Međunarodnog aerodroma Tuzla, ali i Panonska jezera u Tuzli, dadavši da kroz tuzlanski aerodrom godišnje prođe oko 300.000 putnika, te da na godišnjem nivou tuzlanski “slana jezera” posjeti više od 200.000 ljudi. Razvoj turizma posebno zahvaljujući posjetama turista tokom ljetne sezone doprinosi razvoju turističke privrede, a samim time generira i ukupnu privredu Tuzlanskog kantona. Evidentno je da je izuzetno veća potrošnja u segmentu ugostiteljstva, odnosno, tzv. usluge hrane i pića u toku ljetne turističke sezone, kaže Mešković, dodavši da se bilježi povećanje prodaje nafte i naftnih derivata.

Kandidati uspješno završili obuku programiranja industrijskih robota



S ciljem unapređenja ličnih i organizacionih performansi, prvim kandidatima koji su u proteklom periodu uspješno prošli besplatnu edukaciju iz oblasti programiranja robota, juče su u Njemačkom centru za robotiku - DKR uručeni certifikati. Cilj obuke bio je sticanje znanja i praktičnog iskustva, kao i formiranje stručnih kadrova koji će moći ponuditi različite usluge koje su prilagođene potrebama korisnika na najnovijim upravljačkim sistemima KUKA i ABB. Dvanaest kandidata, kroz ovu obuku, je naučilo kako opslužiti i upravljati robotima na nivoima BASIC i PRO. Do kraja septembra 2017. godine planirano je da besplatnu edukaciju programiranja industrijskih robota dobiju još preko 60 kandidata. Osim pomenute edukacije, zainteresirani kandidati u ovom centru mogu pohađati razne trening programe. Trenutno je veoma aktuelan program pod nazivom “SoftSkills 1 i 2”, uz pomoć kojeg polaznici mogu unaprijediti svoje socijalne i komunikacijske vještine, kao i usavršiti liderstvo i komunikacije u savremenom poslovnom okruženju. Inače, Njemački centar za robotiku DKR je smješten u renoviranim i moderno opremljenim prostorijama u SKPC Mejdan (pješačka zona), a svečano je otvoren u martu ove godine. Pored edukacije, DKR nudi i usluge cjelokupnog inženjeringa, programiranja robotskih sistema, kao i industrijske automatizacije...jer mi pokrećemo budućnost!

D.K.



Uspješnih 15 godina „Fininga“...

Završavaju i 500. dizalicu!!!

Ugovoren posao za naredna tri mjeseca



Zaposlenici i menadžment „Fininga“ iz Gračanice, specijalizirane kompanije za proizvodnju mosnih i portalnih kranova, te raznih teretnih platformi, radno i skromno obilježavaju 15 uspješnih godina rada. Dobili su i C broj, čime su u potpunosti otklonjene carinske barijere. I tako četrdesetak zaposlenih nastavlja da ostvaruje dobre rezultate. Kako je za „Dnevni avaz“ izjavio vlasnik i generalni direktor „Fininga“ Midhat Čehajić, za velika slavlja i riječi u ovoj firmi nemaju vremena. Umjesto toga, punom parom se radi, da se u narednih nekoliko dana proizvede i na tržište isporuči 500. dizalica, što će biti velika radna pobjeda svih zaposlenika. Još se ne zna ni ko će biti vlasnik jubilarne dizalice, proizvedene u pogonima „Finiga“, koji se nalazi u Poslovnoj zoni Šenik u Gračanici.. **“U vrijeme kada obilježavamo jubilej, našu 15. godišnjicu, ostvarili smo rekordnu mjesečnu proizvodnju u junu, koja je vrijedna oko 400.000 KM. Naime, u junu smo proizveli dizalice nosivosti 30,5 tona za kompaniju “Sprega-kamen” u Splitu, za “Enterijer-Janković” u Novom Sadu, te dizalicu nosivosti 42 tone za “Elektroprivredu RS”, tačnije za “Elektrodistribuciju Pale”, potrebne za gradnju hidroelektrane na rijeci Željeznici”, kaže Čehajić.** Ističe kako je posao ugovoren i za naredna tri mjeseca za poznatog kupca i da firma stabilno posluje. Velika je stvar i proljetna proizvodnja najduže dizalice u Bosni i Hercegovini. U ovoj firmi se nadaju da će i prostorni plan za Poslovnu zonu Šenik uskoro biti gotov. Naime, nakon toga će početi pripreme za gradnju još jedne proizvodne hale.

Nastavak saradnje Komore i Ministarstva pravde FBiH...

U Komori pripremni seminar za polaganje pravosudnog ispita

Seminar traje 120 časova, obradit će se ispitna materija iz krivičnog prava, građanskog prava sa porodičnim pravom, privrednog prava, upravnog i radnog prava te ustavnog sistema i organizacije pravosuđa



Obavještavamo Vas da Kantonalna privredna komora Tuzla u saradnji sa Federalnim ministarstvom pravde organizuje Instrukivni pripremni seminar za polaganje pravosudnog ispita. Cilj seminara je da se diplomiranim pravnicima, koji ispunjavaju zakonom propisane uvjete za polaganje pravosudnog ispita, omogući da steknu dodatna znanja i praktična iskustva od strane predavača iz pojedinih pravnih oblasti, imenovanih od strane

Federalnog ministarstva pravde, te time olakšaju pripremu za izlazak na ispit. Seminar traje 120 časova, obradit će se ispitna materija iz krivičnog prava, građanskog prava sa porodičnim pravom, privrednog prava, upravnog i radnog prava te ustavnog sistema i organizacije pravosuđa. Predavači na seminaru su članovi/ispitivači Komisije za polaganje pravosudnog ispita. Seminar će se obavljati u velikoj sali Kantonalne privredne komore Tuzla u dane vikenda i prilagodit će se polaznicima. Nakon završetka programa, polaznicima će se izdati certifikat o pohađanju pripremnog edukacijskog programa za polaganje pravosudnog ispita. Molimo, ukoliko ste zainteresovani za učešće na navedenom seminaru da popunjenu prijavu pošaljete na fax broj 035/369 -552 ili e-mail edina.kanic@kpktz.ba. Kontakt osoba Edina Kanić, telefon broj 035/369-550. Kotizacija: 800,00 KM po polazniku (u cijenu je uključen PDV). Navedeni iznos se može platiti u tri rate. Kotizacija se uplaćuje na žiro račun Komore: Sparkasse Bank dd Filijala Tuzla 199-507-00563329-56. Prijavu preuzeti na web stranici Komore: kpktz.ba.


D.K.



VANJSKOTRGOVINSKA RAZMJENA BIH ZA PERIOD I-VI 2017

U prvom polugodištu 2017. godine, na nivou Bosne i Hercegovine ostvaren je ukupan obim vanjskotrgovinske razmjene u vrijednosti od 14.123.107.000 KM što predstavlja rast vanjskotrgovinske razmjene za 14% u odnosu na prvo polugodište 2016.godine. Ostvaren je ukupan izvoz u vrijednosti od 5.351.121.000 KM (+13,91%) i uvoz u vrijednosti 8.771.985.000 KM (+13,90%). U navedenom periodu ostvaren je vanjskotrgovinski deficit od 3.420.864.000 KM dok je pokrivenost uvoza izvozom iznosila 61%.

Najviše vanjskotrgovinske razmjene Bosne i Hercegovine se odvija sa zemljama Evropske unije, a posmatrano pojedinačno, najznačajniji obim je sa Hrvatskom, Njemačkom i Srbijom.




Država	Izvoz (000 KM)	Uvoz (000 KM)	Obim (000 KM)
Hrvatska	620.485	1.331.628	1.952.113
Srbija	523.629	1.188.327	1.711.956
Njemačka	778.615	834.900	1.613.515
Italija	605.826	802.099	1.407.925
Slovenija	464.714	811.331	1.276.045
Austrija	445.104	444.485	889.589
Turska	188.395	310.303	498.698
Mađarska	119.173	319.603	438.776
Holandija	131.550	208.885	340.435
Švicarska	75.925	242.457	318.382
Poljska	56.517	232.079	288.595
SAD	39.721	237.708	277.429
ostale zemlje	1.301.467	1.808.182	3.109.649
UKUPNO	5.351.121	8.771.985	14.123.107

Prema sektorima, najveća vrijednost izvoza je ostvarena kod izvoza drveta, papira i namještaja (1.068.117.123 KM) dok je najveći uvoz mašina, aparata, mehaničkih uređaja i oružja (1.962.146.260 KM).

Federacija Bosne i Hercegovine je u prvom polugodištu 2017. godine ostvarila obim vanjskotrgovinske razmjene 9.429.021.000 KM što je rast obima razmjene za 14,21%. Ostvaren je ukupan izvoz od 3.475.320.000 KM (+12,73%) i uvoz od 5.953.701.000 KM (+15,1%). Pokrivenost uvoza izvozom je 58,4% dok je vanjskotrgovinski deficit 2.478.380 KM. Posmatrano po kantonima, najveći izvoznici su Zeničko – dobojski i Tuzlanski kanton, dok je najveći uvoznik Kanton Sarajevo.

	Izvoz (000 KM)	Uvoz (000 KM)
Unsko-sanski kanton	140.671	184.424
Posavski kanton	65.703	105.914
Tuzlanski kanton	750.185	860.390
Zeničko-dobojski kanton	878.095	994.590
Bosansko-podrinjski kanton	90.532	57.820
Srednjobosanski kanton	345.887	474.848
Hercegovačko-neretvanski kanton	368.665	579.193
Zapadno-hercegovački kanton	242.597	620.789
Kanton Sarajevo	545.694	1.994.209
Kanton 10	47.292	81.525
UKUPNO	3.475.321	5.953.702




Po grupama proizvoda, iz Federacije BiH, najviše je izvezeno metala i njihovih proizvoda (719.211.956 KM), namještaja, posteljina i madraca (453.105.422 KM) i tekstila (366.596.495 KM). Najviše su se uvozila mineralna goriva (851.459.297 KM), metali (684.776.202 KM) i tekstil (522.466.076 KM).

U prvom polugodištu 2017. godine iz Tuzlanskog kantona ukupno je izvezeno proizvoda u vrijednosti od 750.185.000 KM što je u odnosu na isti period 2016. godine rast izvoza od 19,72%. U isto vrijeme je došlo do rasta uvoza od 18,32% te je uvezeno roba u vrijednosti od 860.390.000 KM. Pokrivenost uvoza izvozom je 87,19%, a vanjskotrgovinski deficit je 110.204.000 KM.


Najznačajniji vanjskotrgovinski partneri Tuzlanskog kantona su Njemačka, Slovenija, Italija, Hrvatska i Austrija.

U odnosu na isti period 2016. godine, došlo je do rasta izvoza svih vrsta proizvoda i to: hrane i pića od 12%, goriva i maziva 89,3%, kapitalnih proizvoda 4,7%, proizvoda za široku potrošnju 7,3%, industrijskih materijala 10,6% i transportnih sredstava 5,3%.




Rast uvoza u odnosu na prvo polugodište 2016.godine je ostvaren kod industrijskih materijala 3,1%, transportnih sredstava 4,6%, proizvoda za široku potrošnju 22,1%, hrane i pića 19,1%, goriva i maziva 100% i kapitalnih proizvoda 21,7%.

Po pojedinačnim vrstama proizvoda, najviše su se uvozili kameni uglj, govede kože i zračne pumpe, a najviše su se uvozili karbonati i peroksikarbonati, koks i dijelovi za motore sa unutrašnjim sagorijevanjem.





THE CHAMBER OF ECONOMY OF TUZLA CANTON



TUZLA CANTON

Your Business Partner

